



Gabinete Wever - Croes II



ISLAONLINE

Noticia di Gobierno

2023

Diamars 19 September 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



ARUBA A PRESTA PLACA DI HULANDA PA SOBREVIVI E PANDEMIA

“Nos a bay di acuerdo cu e tres condicionnan aki pa necesidad, pasobra no tawata tin otro forma”



Prome Minister Evelyn Wever-Croes den conferencia di prensa di Gobierno di Aruba dialuna mainta, a duna un splicacion Amplio riba Raft y negosacion cu Hulanda. Prome Minister a enfatisa cu pa comprende e tema aki miho, ta importante pa bay bek na aña 2020 tempo cu e pandemia a bati na nos porta y Hulanda tawata e unico na unda Aruba por a acudi pa presta placa.

PERDIDA DI ENTRADA Y GASTONAN EXTRA

Na e momento ey, e perdida di entrada tawata 834 miyon florin. Aparte di e perdida di entrada considerable aki den e añanan 2020, 2021 y 2022, a bin gastonan acerca hopi grandi cu normalmente Gobierno no ta carga, entre otro Proyecto di FASE di 79 miyon florin; Proyecto pa sosten financiero pa prestamo mediano y chikito (MKB) di 44 miyon florin; subsidio di salario di 415 miyon florin; y a inverti 177 miyon florin extra pa mantene fondo di AZV y SVb solido. Pa logra tur esaki, Gobierno di Aruba mester a presta 916 miyon florin di Hulanda.

SUBSIDIO

Prome Minister a remarca cu mescos cu paisnan entre otro Spaña y Grecia, na maart di aña 2020 cu Covid a bati na nos

porta, Aruba a pidi Hulanda pa yuda nos cu un subsidio, un placa cu no mester paga bek. Pero no cu fianza. E decision inmediato di Hulanda tawata cu lo no duna subsidio of ‘schenking’ sino un fianza.

Den un articulo di e ex Secretario di Estado di e tempo ey, Raymond Knops, cu a wordo publica na mei 2020, den su declaracion el a compromete cu si e paisnan den Reino muestra suficiente recuperacion, Hulanda lo por duna dispensacion. Esaki ta un declaracion cu el a duna dia 21 mei 2020 den Parlamento Hulandes. Señor Knops a acopla un dispensacion na reformanan of condicionnan.

ARUBA A BAY DI ACUERDO CONDICIONNAN

Na November di aña 2020, Aruba a bay di acuerdo cu 3 condicion pa haya placa. E prome condicion tawata ta cu Aruba mester a acepta un ‘onderlinge regeling’, un acuerdo mutuo na unda lo defini cua reformanan ta importante, e Landspakket. E di dos condicion tawata cu lo introduci un ley di Reino pa reforma, CHE cu a bira COHO y despues a bira OR Onderlinge Regering. E di tres condicion ta e ley di Reino pa supervision financiero, RAft. Mientras cu Corsou y Sint Maarten solamente mester a cumpli cu e prome dos condicionnan, Aruba a haya tres condicion, cu RAft acerca. “Nos a bay di acuerdo cu e tres condicionnan aki pa necesidad, pasobra no tawata tin otro forma”, Prome Minister a enfatisa.

Na e momento ey, Prome Minister a remarca, tawata tin 40 mil ciudadano adulto di nos pais tawata depende di placa cu Gobierno mester a duna nan sea ta pa FASE, loonsubsidie, y na otro sostennan cu Gobierno a brinda den e tempo ey. Un den cada dos adulto tawata depende di Gobierno, motibo pa cua Gobierno a bay tambe di acuerdo cu e tres condicionnan aki. “Gobierno, e tempo ey a haya hopi presion di comunidad pa firma pa caba, y esaki ta loke cu Gobierno a haci tambe y a haya placa pa sobrevivi”, Prome Minister a expresa.

PRESUPUESTO 2023


IMPACTO COVID RIBA FINANSA PUBLICO

PRESUPUESTO




Gobierno di Aruba

PERDIDA DI ENTRADA:
-834 Mijon Florin den 3 aña



715 Mijon Florin
na sosten financiero



ParadiseFM | Kans op kwijschelding miljoenenlening



17 reacties

donderdag 21 mei 2020



*Maar, de lening wordt niet bij voorbaat
kwijsgescholden, zoals de eilanden vragen.
“Want daarvoor is er te veel gebeurd”, aldus
Knops / Extra*

Als de eilanden genoeg voortgang laten zien,
dan is er een kans de honderden miljoenen
aan leningen worden kwijsgescholden.

Dat zei Staatssecretaris Raymond Knops
vanmorgen tijdens het Tweede Kamerdebat.
Caribisch Netwerk schrijft erover.

• 3 CONDICION DI HULANDA PA FIRMA 13 DI NOVEMBER 2020

1

ONDERLINGE REGELING:

Acuerdo cual reformanan ta
importante / Landspakket

2

RIJKSWET PA REFORMA:

CHE / COHO

3

RIJKSWET PA SUPERVISION
FINANCIERO:

RAFT

Prome Minister Evelyn Wever-Croes:

CENTRAAL MAGAZIJN / BID A EXPRESA PALABRA DI GRATITUD NA PROME MINISTER, PA TA E UNICO MANDATARIO CU A SCUCHA Y CUMPLI CU NAN



Diabierna atardi, a tuma luga e apertura di e edificio remodela di Centraal Magazijn Bureau Interne Diensten (BID). Prome Minister Evelyn Wever-Croes tabata presente, hunto cu "Waarnemend Chef" sr. Ricky Koolman, pa asina ricibi e yabi di e edificio nobo aki. Durante un entrevista, Prome Minister a splica cu na momento cu su persona como minister encarga a mira e situacion deplorabel cu e edificio ta den, el haci un promesa pa drecha e luga, pa crea un ambiente mas agradabel pa e empleadonan. E promesa aki a wordo cumpli diabierna ultimo, na momento cu e yabi di un hoyo di edificio a wordo entrega na su persona.

PROME MINISTER EVELYN WEVER-CROES TA E UNICO CU A "WALK SU TALK"

Durante e actividad aki, por a nota e felicidad y emocion den cada un presente. Sr Koolman a tuma e oportunidad pa



gradici Prome Minister pa no solamente a scuchanan, sino pa ta e unico mandatario cu a cumpli cu nan. El a indica cu Su Excelencia, Prome Minister Evelyn Wever-Croes ta e unico cu a "walk su talk", cu despues di un bishita, a percura pa duna e luga un "facelift" y a drecha e bañonan. Despues a sigui cu e trabounan di remodelacion pa awe, nan ta para den un luga limpi, den bon estado, nobo y hopi mas grandi. "Di mi curason mi ta gradici Prome Minister pa tur su esfuerso den cumpli cu nos deseo di hopi aña. Nos tabata traha den un situacion deplorabel, y un edificio cu no tabata apto pa por cumpli cu nos debenan efectivamente. Danki na e remodelacion aki, nos empleadonan por duna un servicio mas eficiente na e otro departamentonan di gobierno" tabata palabranan di sr Koolman.



MINISTER ARENDS TA PROMOVE PARTICIPACION DI ADULTO MAYOR: ELIMINANDO DISCRIMINACION A BASE DI EDAD DEN ENTIDADNAN GUBERNAMENTAL

Discriminacion a base di edad, of edadismo, ta un problema presente den nos comunidad, sigur den area di empleo, cu tin efecto negativo riba e grado di participacion activo di cierto gruponan. Por ehempel, den statuutnan di diferente entidad gubernamental a ser observa clausulanan preocupante tocante e edad di miembro di directivanan. Den algun caso ta menciona edad como motibo di exclusion obligatorio den e rekisitonan pa wordo nombra como miembro di un consejo. Por ehempel, Serlimar S.G. no por tin miembro mayor cu 65 aña y na ANSA N.V., un comisario cu ta yega 70 aña mester tuma retiro.

Den e cuadro di e vision pa stimula participacion di Adulto Mayor den nos comunidad, Minister Arends a solicita consehonan di tur instancia cu ta resorta bou di su carteranan pa identifica y elimina tur forma di edadismo di nan organisacion rapidamente.

Discriminacion a base di edad ta innecesariamente ofensivo pa esnan afecta y tambe por perhudica e maneho di un organisacion. Edad ta aporta experiencia, conocimiento y confiansa. Calidadnan cu mas bien mester wordo exige di miembronan di un directiva. E exclusion arbitrario di candidatonan a base di edad, ademas di ta ofensivo, por causa un 'fuga di talento'. Sector publico lo beneficia di elimina tur clase di edadismo, ora ta trata adulto mayor, di cada instancia.

Minister Arends a propone na consejo di ministro pa adopta e principio di no permiti uzo di edad como criterio pa contrata,



nombra of despedi miembronan di directivanan. Nombracion y retiro den directivanan mester ta a base di cumplimento cu 'Good Corporate Governance'. Esaki ta un vision cu lo purba di realisa pa mitad di otro aña 2024. Pues tur forma di edadismo lo mester wordo elimina di statuutnan di entidadnan gubernamental pa e tempo aki.

Adoptando e principio aki lo duna sector priva un señal pa sigui gobierno su ehempel y asina efectivamente combati e tipo di discriminacion aki riba nos isla.

Minister Arends ta remarca cu 'nos comunidad di e tercera edad, cu a construi e pais aki, ainda tin hopi pa brinda nos' y cu 'e bon integracion di adultonan mayor den nos sociedad lo solamente fortalece nos mas como pais'.



Xiomara Maduro
MINISTER

MINISTER DI CULTURA TABATA PRESENTE NA E DESVELO DI 'MI FORSA' DI E ARTISTA LOCAL PAUL WONG

Un di e muralnan di mas nobo den caya di San Nicolaas



Recientemente, Minister di Cultura, Xiomara Maduro, tabata un di e invitadonan di Artisa pa presencia e desvelo di e mural di e artista local Paul Wong. E atardi aki a cuminsa cu un tour duna door di Tito Bolivar caminda cu a presencia un obra di mosaic na comienso di caya grandi di Omaira Silva. E obra aki, un octopus completamente traha di mosaic, ta un bunita adicion na e cayanan di San Nicolaas.

Despues di esaki e tour a sigui pa e siguiente stop cu tabata un mural 3D di e nomber di Aruba, traha pa nos artista local Robert Solognier, miho conoci como Ice One. E obra aki ta un obra cu ta captiva tur esnan cu pasa mir'e mirando cu e ta consisti di diferente componentenan cu ta forma nos Pais,

manera San Nicolaas store, Kapel di Alto Vista y e Lighthouse pa menciona algun. Sin duda un mural cu ta duna realse na locual ta haci nos Pais uno unico.

Finalmente, e tour a caba cu e desvelo di e mural di Paul Wong titula 'Mi forza' cu ta e escudo di Aruba traha den forma cu e leon ta haya un bida, cu e palabranan 'un tin nada pa kibre', poniendo enfasis riba e forza di nos Pais. Minister Maduro ta gradici Artisa pa e invitacion y tambe ta gradici tur artista cu a duna nan contribucion na e Aruba Art Fair, creando obranan unico un biaha mas pa tur esnan cu bishita por admira. Un invitacion ta bay pa tur esnan cu no a bishita San Nicolaas ainda, pa pasa y admira e obranan di mas nobo.

Continuacion POTRETNAN DI DESVELO DI 'MI FORSA'





QUOTA INTERNATIONAL ARUBA CONSCIENTISANDO PUEBLO RIBA OIDO PA 34 AÑA

Dialuna tardi Minister di Turismo y Salud Publico sr. Dangui Oduber tabata presente na e apertura di e siman importante, “Siman di Conscientisacion di Oido” organisa pa Quota International of Aruba. Aki e mandatario a hiba un discurso y despues tabata tin e oportunidad pa haci un test di su oido.

Quota pa e ultimo 34 añanan a bin ta haciendo testnan di oido durante luna di september completamente gratis. Quota a cuminsa 34 aña pasa na mesun lugar di Fepoh. E aña aki e dicho a wordo cambia pa “Siman di Conscientisacion di Oido”. Nos tabata conoce esaki antes como siman di kibra silencio.

Na Aruba e cantidad di hendenan bou di 65 aña cu tin problema di oido ta alarmante. Pesey e parti di conscientisacion ta hopi importante. Esaki ta cuadra tambe cu e maneho di Ministerio di Salud Publico cu ta basa riba prevencion. Pa es motibo Quota International of Aruba hunto cu FEPOH ta purba na conscientisa e comunidad mas hopi cu ta posibel pa cuida di nan oido na scolnan y tambe otro instancianan.

FEPOH ta un istancia cu no solamente ta yuda na conscientisa pero tambe ta yuda na mehora e comunicacion di un persona cu oido malo. Esaki ta danki na e logopedistanan y tambe na e aparatonan di oido cu nan ta busca.

Quota semper a y lo sigui duna e comunidad di Aruba informacion tocante e causanan di perdida di oido, medidanan di prevencion y e importancia di detecta trempan door di bai controle di oido regular. Segun e mandatario ta importante pa nos ta consciente cu una bes bo perde bo oido, bo no por recupera esaki bek.

Finalmente e mandatario a gradici Quota International of Aruba y tambe FEPOH pa tur locual nan ta haci pa conscientisa nos pueblo riba e cuida di nos oido. Prevencion ta e solucion.



Minister Dangui Oduber:

GLOBAL TRAVEL CONFERENCE TA PA CREA UN FUTURO PROSPERO PA ARUBA COMO DESTINACION

Dialuna y diamars Minister di Turismo sr. Dangui Oduber a atende e Global Travel Conference organisa pa Aruba Tourism Authority. Dialuna e mandatario a hiba algun palabra yamando Bon Bini na tur e invitadonan y socionan di mercado Norte Americano, Canades, Latino Americano y Europeo.

E Global Travel Conference ta di dia 18 pa 22 di september. Total tin 58 participante (Tour Operators y Aerolineanan) di 16 diferente pais participando na e conferencia. E meta di e conferencia aki ta pa e socionan den turismo bin Aruba y experencia kico Aruba tin di ofrece turisticamente y tambe haya informacion riba desaroyonan cu ta andando di producto Aruba. Pa asina e socionan conoce otro y traha riba futuro negoshinan for di nan pais pa Aruba.

Un conferencia pa estrena Aruba na nos socionan pa asina nan por conoce e vision y maneho di turismo como tambe Aruba su historia y cultura. Durante e programa e participantenan lo experencia Aruba di mesun manera cu e biaheronan lo experencie segun e tendencianan di biahe pa aña 2024.

Finalmente Minister Dangui Oduber a yama danki na Aruba Tourism Authority pa organisa e reunion Global Travel Conference y tambe tur esnan cu di un manera of otro ta contribui na e turismo di Aruba. Turismo ta keda e driver principal di nos economia.





MINISTER WEVER TA REUNI CU KIWANIS SAN NICOLAS PA FEEDBACK RIBA PROYECTO PA SAN NICOLAS



Den un desaroyo prometedor pa e centro di San Nicolas, Minister di Asuntonan Economico, Geoffrey Wever, a reuni recientemente cu miembronan di Kiwanis San Nicolas. E agenda principal di e reunion tabata pa hiba un discucion constructivo y ricibi feedback valioso tocante e plannan propuesta pa revitalisacion di centro di San Nicolas.

Minister Wever a expresa su gratitud pa e oportunidad di conecta cu e miembronan di Kiwanis San Nicolas, y tambe ta reconoce nan dedicacion pa mehora e comunidad. E mandatario a enfatisa e importancia di unifica perspectivanan diverso pa 'fine-tune', mehora y solidifica e plannan di revitalisacion.

"Feedback ta vital pa duna forma na nos ideanan y transforma nan den strategianan cu ta posibel pa ehecuta," Minister Wever a menciona. A enfatisa cu e meta final ta pa logra un cambio

positivo y duna bida nobo den curason di San Nicolas.

Revitalisacion di area Central ta un proyecto di multi-fase cu ta exige un comprendimento integral di e necesidadnan y aspiracionnan di e comunidad. Minister Wever ta reconoce e importancia di logra un consensus entre e habitantenan di San Nicolas. Exito lo depende riba e colaboracion y di esfuerso colectivo di e comunidad cercano.

E reunion entre Minister Geoffrey Wever y Kiwanis San Nicolas ta subraya e compromiso di Gobierno di Aruba pa desaroyo inclusivo y sostenibel, impulsa y sosteni pa comunidad. E ta sirbi como un paso prometedor riba e caminda pa revitalisacion di centro di San Nicolas, asegurando cu e area historico aki ta por prospera y mantene su zjeito como un centro vibrante y cultural pa habitantenan y tambe pa turistanan igual.



A CLARIFICA SITUACION DI HELICOPTER DI POLIS



Awe durante Conferencia di Prensa di Gobierno di Aruba, minister di Husticia y Asuntonan Social a hiba palabra pa asina clarifica un cu e otro pa loke ta trata e Helicopter di Cuerpo Policial, caminda a sali den noticia tocante un persona cu lo ta traha cu e compania di cual nos ta lease e helicopter aki, lo a ser captura pa husticia.

Ta asina cu na momento cu nos a haya sa e informacion aki, na comienso di 2022, tocante e persona en cuestion aki, Gobierno di Aruba mesora a haci su "due diligence" pa sigura cu e compania en cuestion ta cumpli cu e rekisitonan ankra den e contract. Di cual un di nan ta cu nan mester ta "in good standing" pa loke ta e parti hudicial. Pues, esaki a resulta di ta e caso cu en berdad, e persona no ta doño ni shareholder di e compania, pero solamente un trahado, cual por cierto na december 2020 su relacion di trabou cu e compania a

termina. Pais Aruba no a firma ningun acuerdo tampoco cu e persona aki.

Adicionalmente, a solicita un reunion cu Parlamento di Aruba, pa asina nan mes por haya un aclaracion detayadamente, y asina wak pa nan mes cu e compania ta in good standing, y cu e persona en cuestion no ta shareholder, y tampoco a firma nada cune. Na mes momento lo comparti tambe tur e documentonan y correspondencia cu mi a ricibi cu Parlamento.





MINISTER ENDY CROES A ELABORA RIBA DIFERENTE PUNTO DI ENSEÑANSA DURANTE REUNION PUBLICO DI PARLAMENTO DI ARUBA

Recientemente, a trata Presupuesto Supletorio 2023 di Pais Aruba durante reunion publico di Parlamento di Aruba. Minister di Enseñansa y Deporte Endy Croes a contesta pregunta en relaciona cu Ministerio di Enseñansa di e parlamentarionan durante desertacion. Minister Endy Croes a splica durante e reunion publico cu tur scol y directiva di scol lo haya ahustacion di “normbedrag”, pues “normbedrag” di cada scol lo aumenta.

Tambe durante e reunion publico, Minister Endy Croes a elabora riba e cambio cu a haci di e suma di AWG. 350 mil di Instituto Pedagogico Arubano (IPA). E suma aki ta destina pa otro proyectonan di Departamento di Enseñansa (DEA), entre otro, Desaroyo y Revision di Metodo pa e manejo di idioma nobo. E mandatario di Enseñansa a splica cu esaki no lo afecta e “onderwijsklimaat” na IPA, pa motibo cu e no ta structural y ta solamente pa aña 2023.

Banda di esaki, Minister Endy Croes a responde na un mocion cu a haci pa amplia trahado social na scol. Minister Endy Croes a indica cu den enseñansa di Aruba nos ta tene cuenta cu tur sorto di trastorno, dependiendo di e atencion medico cu tin. Si un experto, manera psicologo y/of psiquiatra indica locual mester haci na momento di traha evaluacion, ta duna extra tempo na e alumnonan aki. Tambe, a sigui bisa cu e ta consciente di e problemanan cu tin riba tereno di salud mental, p’esey ta trahando riba un forma pa mehora e structura di cuida den enseñansa di Aruba pa haci esaki eficiente.

Ademas, Minister Endy Croes a señala cu ta trahando riba enseñansa primario, unda cu un di e medidanan ta pa yega na “sensitief responsief onderwijs”, cual ta encera pa e adulto por actua mas dirigi riba e necesidad social emocional di e alumno. E adulto por ta un mayor, maestro of un “schoolleidster”. Tambe, un di e medidanan ta pa e maestro tin e hermentnan necesario pa nan por aplica “sensitief responsief onderwijs” na scol.



FALTA 3 DIA MAS PA POR PARTICIPADEN E CONCURSO DI PINTAMENTO "CACHO DEN CURA"

E aña aki ta di cinco aña consecutivo cu ta organisa un Concurso di Pintamento, pues Gobierno di Aruba ta celebrando su prome lustro pa cu esaki.

E meta di e concurso ta pa conscientisa specialmente nos muchanan tocante Aruba su Ley di Cacho. E muchanan na nan turno a traves di nan pintura ta expresa y por siña mas tocante e ley aki y nan tambe kisas lo por educa hendenan rond di nan ora nan mira algo cu no ta cuadra cu nan deber. E aña aki e muchanan mester pinta un of mas cacho den cura; Minister di Enseñansa Endy Croes a dicidi di sigui e liña di e campaña cu Cuerpo Policial a inicia na juli: Cacho Den Cura, Ta Ley E Ta.

Participacion ta gratis y tur mucha cu ta bay scol basico por participa. Si abo como mayor sa cu bo yiu no a ricibi e formulario na scol, por download e formulario via www.specialprojectsaruba.org tambe pa print pagina 2 (e print mag ta blanco cu preto); pagina 1 ta e pagina di informacion.

E pintura mester ta na color y pinta door di e mucha mes, pues sin ayudo di un mayor. Detayes con pa por comunica cu e alumno cu a gana tambe ta importante pa wordo menciona riba e formulario di participacion.

Ultimodiacuporentregaeformularionan di participacion ta diabierna dia 22 di september 2023. Por entrega e formularionan na Bestuurskantoor Oranjestad, na HBK San Nicolas of na e MFA mas cerca.

E ganadonan lo wordo anuncia dia 4 di october 2023 riba e pagina di Facebook di Gabinete Wever-Croes. E muchanan cu gana lo wordo invita den e luna di october, despues di vakantie, pa ricibi nan regalito.

Gobierno di Aruba ta invita tur mayor y maestro pa stimula e muchanan cu ta bay scol basico pa participa. Minister Endy Croes ta spera di por "conta cu un cantidad record e aña aki". Si tur ciudadano di Aruba cuminsa inculca e atencion debido di nos Ley di Cacho den nos muchanan, nos lo por garantiza un bunita futuro pa locual ta trata doñonan di mascota responsabel cu ta respeta ley y alabes nan propio cachonan.

Informacion di Participante

Number y Fam: _____
Fecha di Nacemento: _____
Scol: _____
Number di Telefon di Mayor: _____

**3 DIA SO MAS
PA BO CABA DI PINTA
1 OF MAS CACHO DEN CURA**

Un number faborito pa bo cacho: _____ **CORDA SKIRBI UN NOMBER**

I ♥ my PET

Ganador Concurso 2019 – Jouelle Farro, categoria 11-12año

Area pa pinta

Area pa pinta



GOBIERNO TA KEDA DETERMINA PA BAHAWA Y CORIENTE



Durante un conferencia di prensa di Gobierno, Minister di Energia Glenbert Croes, a wordo cuestiona riba loke ta e ganashi pa 2024, di 15 miyon florin, presupuesta pa Utilities Aruba NV. Minister Croes a clarifica cu na momento cu e companianan estatal, WEB, ELMAR Y Utilities traha nan presupuesto, nan ta traha esaki a base di nan inversionnan, costo di operacion, maneho di Gobierno pa reduci awa y coriente, y pa e parti cu ta toca Gobierno como accionista final. E suma aki, tambe ta pa cubri tur compromiso financiero cu Gobierno tin. E no ta un secreto cu e nivel di debe di Aruba ta hopi halto, y esaki no ta solamente debi na e pandemia, sino tambe na e debe grandi cu Gabinete Mike Eman a laga atras pa nos pueblo, cu ta compromisonan financiero cu Aruba y Gabinete Wever Croes a hereda y mester cumpli cu ne.

Minister Croes tambe a indica, cu Gobierno ta haciendo nan maximo esfuerso, por medio di diferente proyectonan energetico, pa asina yuda baha e gastonan pa e companianan estatal. E proyecto di Eagle LNG, programa di hedging, e

negociacionnan cu por ehempel Petroecuador, e tender cu actualmente ta tumando lugar ta pa yuda baha e gastonan involvi na momento di compra heavy fuel oil, generando mas entrada pa WEB, cu e resultado di por baha e prijs di awa y coriente.

"Finalmente, e ta Gobierno su compromiso pa haci tur lo cual ta na su alcance pa baha costo di bida y esey nos ta bin ta haciendo. E no ta un proceso facil, pero nos ta keda comprometi cu nos pueblo. Mirando tur e esfuersonan cu Gobierno ta bin ta haciendo, pronto nos lo logra. Mi kier a pidi pueblo di Aruba y specialmente esnan cu ta apreciativo di e trabounan duro cu Gobierno ta bin ta haciendo, pa no laga e comentarionan negativo y destructivo, afecta boso pensamentonan. Cambia tur e negativismo den positivismo, mustrandu tur esnan skeptico, cu na final di dia, tur e esfuersonan di e Gobierno actual, lo trece resultado positivo pa cada ciudadano di pais Aruba. Nos compromiso ta y lo keda semper e progreso y bienestar di nos pueblo." Minister Croes a expresa.

DIA DI LIMPIEZA MUNDIAL, ARUBA TAMBE A PARTICIPA CU ACCION DI BAKI DEN BARIO Y BEACH CLEAN-UPS

Dia di Limpieza Mundial ta un evento global cu ta tuma lugar tur aña riba e di tres diasabra di september. E iniciativa aki ta di e organisacion "Let's do it, World." E movimiento global aki a cuminsa na Estonia na 2008 ora cu 50,000 boluntario a limpia e pais den solamente cinco ora. Desde e tempo ey Dia di Limpieza mundial a haya popularidad. E ta un iniciativa global pa accion colectivo pa combati un di e problemanan ambiental mas presente di nos tempo: polucion di plastic. Na 2021, mas di 180 miyon di hende den 180 pais a participa den e evento Dia di Limpieza Mundial. E dia aki ta un oportunidad pa hende di tur parti di mundo bini hunto y haci limpi den nan bario, comunidad, pais of e bida marino. E aña aki, Aruba tambe a uni na e causa di limpieza. Diasabra pasa e campaña Baki den Bario; Aruba Limpi Limpi tawata activo den Santa Cruz. E accion di limpieza a tuma lugar na Centro deportivo Nadi Croes & Crismo Angela. Esnan cu a separa nan despercio cu anticipacion, tawata tin e oportunidad pa deshaci di esakinan na un manera responsabel pa medio di e campaña. Directie Natuur en Milieu (DNM) ta encurasha comunidad henter pa haci uzo di e oportunidad di e campaña aki y asina aporta na un Aruba y mundo limpi. Den e relato aki, DNM ta duna un bista riba e significacion di Dia di Limpieza Mundial, su impacto global, y con un individuo y comunidnan por involvi nan mes den e movimiento ambiental vital aki.

E meta di Dia di Limpieza di Mundo ta pa siña hende mas di e problema di polucion. Tuma por ehempel e problema di polucion di plastic y motiva hende pa tuma accion pa haci y mantene nan comunidad limpi. E evento tambe ta pa eleva e sentido di union comunitario y crea un futuro sostenibel. E tema pa e Dia di Limpieza di Mundo 2023 ta "Lanta contra polucion di plastic" y na Ingles, "Rise Up Against Plastic Pollution". E tema ta refleha e consciencia creciente cu tin pa e necesidad pa combati polucion di plastic. Polucion di plastic ta un problema medio ambiental y e ta esun cu nos tur mester atende cune. Polucion di plastic a bira un di e crisisnan ambiental mas grandi di siglo 21. E uzo y e manera incorrecto di deshaci di productonan di plastic a alcanza consecuencia fatal pa nos planeta. For di causa polucion den gran escala di nos oceano y den canalnan di awa te hasta a perhudica bida salvahe y drenta den e cadena di cuminda humano. Polucion di plastic a impacta ecosistemanan y tambe salud di hende. E aspecto alarmante di polucion di plastic ta encera cu e ta persisti den e medio ambiente pa termino largo di centenares di aña cu casi ta imposibel pa e disparce of decompocita. Durante e proceso largo aki, plastic ta desmantela y bira microplastic cu ta penetra den ecosistema. Esaki ta trece menasa di termino largo pa e biodiversidad y bienestar humano.

Aki ta algun cos adicional cu bo por haci pa reduci polucion di plastic:

- Trece semper cu bo, bo tasnan di compras reusabel.
- Bisa NO na saconan di plastic y otro productonan di un solo uzo cu ta di plastic.



- Separa bo desperdicio den categorianan unda ta proces'e y reuz'e den otro forma di produccion. Duna e producto un bida nobo.
- Duna un aporte na companianan cu ta consciente di nan impacto medio ambiental y ta practica reducion di nan desperdicio den proceso di produccion. Si bo ta interesa di participa na Dia di Limpieza Mundial, tin un par di cos cu bo por haci:
- Organisa bo mes un evento di haci limpi. Uni un grupo di amigonan y famia y adopta un area y hunto haci esaki limpi di sushedad. No ta necesario pa corta ningun mata solamente e pikimento di sushi y deshaci di esakinan na e localidad asigna pa esaki.
- Sea un boluntario na ocasion di un beach clean-up of area clenaup den bo mes bario. Tin hopi organisacion cu ta traha na bienestar di medio ambiente manera Turtugaruba, Scubblebubbles y mas.
- Tuma e decision pa cambia bo patronchi di consumo y reduci bo mesun plastic footprint. Cu e terminologia aki ta referi na e impacto medio ambiental cu bo tin door di ta usando plastic. Con pa haci esaki? Nenga plastic di un solo uzo manera straw of saco di plastic. Por recicla y tambe practica trahando bo mesun gordura cu ta di e resto di berdura curu, fruta curu y foyo.

Participando na e accion di Dia Limpieza Mundial, bo ta yuda trece conscientisacion di e reto importante aki y haci un diferencia den bo comunidad. No ta importa con bo ta scoge pa participa, bo esfuerso ta locual ta haci e diferencia. Door di haci bo comunidad of bario limpi, bo ta yuda proteha e medio ambiente y crea un futuro mas sostenibel.

Por ultimo, DNM ta haci un yamada na e comunidad pa saca un potret of video di bo famia of grupo di amistad aportando na e causa di haci limpi y comparti'e riba e plataformanan social y tambe inclui e hashtagnan aki #dnmaruba #WorldCleanupDay #WorldCleanupDay2023 #LetsDoItWorld #WasteFreeWorld



RESUMEN DI SIMAN

Asuntonan General,
Innovacion,
Organisacion Gubernamental,
Infraestructura y
Planificacion Teritorial

PROME MINISTER, EVELYN WEVER-CROES

9 - 15 di september, 2023



• **35 AÑA DI UNIVERSIDAD DI ARUBA**

Prome Minister tabata presente na e apertura di e aña academico di Universidad di Aruba. Durante su discurso el a expresa di ta sumamente orguyoso di tur loke Universidad di Aruba a logra den e ultimo añanan, y a felicitanan cu 35 aña di aniversario. Na final di e mainta invitadonan por a presencia un exhibicion y despues pasa pa un recepcion ameno.



• **70 AÑA ARUBAANSE MUZIEKSCHOOL**

Arubaanse Muziekschool a tene un recepcion, pa celebra nan di 70 aniversario. Prome Minister tabata presente como invitado special na unda el a duna un discurso gradiciendo tur esnan cu di un of otro forma ta haci posibel pa e existencia di e scol y pa crea bon musiconan na Aruba. Den nomber di gobierno di Aruba, el a felicita tur esnan responsabel pa e porvenir y bienestar di e scol y a desea e stichting, hopi mas aña pa crea mas artista pa nos dushi Aruba".



• **AÑA PARLAMENTARIO 2023-2024**

Diamars mainta, 12 di September, a tuma luga e apertura di Aña Parlamentario 2023-2024. Na Parlamento, a tuma luga e ceremonia na unda S.E. Gobernador di Aruba, Alfonso Boekhoudt a declara e aña Parlamentario habri. Esaki ta e di 38 Aña Parlamentario di Pais Aruba. Prome Minister a expresa cu S.E. Gobernador a duna un discurso balansa y a enfatisa cu apesar cu Aruba ta den recuperacion, keto bay Aruba tin retonan y ta solamente trahando hunto y cu e meta central di hiba nos pais dilanti, nos lo crea un futuro miho y mas sostenibel.



• **CREATIVIDAD EPI**

Prome Minister a bishita Colegio EPI en conexion cu e proyecto di innovacion cu EPI a entrega y gana cu ne, pa loke ta e competencia di Edutech. Compara cu otro scolnan, EPI su proyecto tabata mas enfoca riba e docentenan, cu e meta pa despues yega na e alumnonan a traves di e docentenan y prepara nan pa e habilidadnan di siglo 21. Pa loke ta e futuro di Edutech y mirando e interes di e scolnan pa ta parti di e proyecto aki, Gobierno a tuma e decision di sigui un aña mas cu ne. Tambe, ta pidi tur e scolnan pa cuminsa diseña nan proyecto di innovacion di trempan, ya cu e competencia lo ta uno fuerte.



• REUNION CU BANCO CENTRAL

Diahuebs mainta, Prome Minister a reuni cu representantenan di Banco Central riba e tema di seguridad cibernetico. Manera ta conoci, esaki ta un tema importante ya cu Aruba den pasado, tabata victima di un atake cibernetico, cu a causa hopi daño.

Sra Kristel de Nobrega, Manager Information Security, na Banco Central di Aruba a presenta un tesis riba e tema aki, cu a sirbi como guia pa Gobierno hunto cu Banco Central intercambia ideanan, con pa prepara Aruba pa ta mas fuerte na momento cu mester enfrenta atakenan asina



• MOU FIRMA
PA COMPLETA 'EDUCATIONUSA'

Na John F.Kennedy Education Center Aruba, Minister di Enseñansa Endy Croes y Consul General di Merca na Corsou Margy Bond a firma e MOU pa asina completa EducationUSA. Prome Minister tawata presente tambe na e ocasion importante

aki pa nos pais y a expresa di ta sumamente contento cu esaki pasobra e ta un motivacion mas pa traha hunto pa expande educacion cu institutonan na Merca. Aruba como e pais pionero, a cuminsa cu e proyecto aki y ta e unico den Reino cu ta haciendo esaki

Uni forsa y cu
positivismo
ta produci
beneficianan grandi
den diferente area pa
famianan, politica,
matrimonio, pais, etc
Hunto nos ta uza e
benificianan aki pa
engrandece nos mes
y Aruba.



2023

AÑA DI UNION Y POSITIVISMO! _____